

E Porkeria di Pornografia

E krímen tabata horíbel! Segun nos ta komprendé, kuater hómber a viola un dama bishitando nos isla. Mes ora nos komunidad ta preokupá. Nos ta preokupá, pasobra esaki ta konfirmá nos temor ku kriminalidat ta eskalando. Nos ta preokupá pa e afekto ku e krímen aki lo tin riba nos ekonomia, turismo en partikular.

Ma mi no a tende ningun preokupashon ekspresá pa un pusíbel kousa di un akto tan skandaloso.

Tempu nos tabata mucha, e palabra "pornografia" a ser usá eksklusivamente pa ku revistanan òf plachinan di hende muhé tòples òf sunú. E interes di un hóben pa mira pòrtrèt di kurpa di hende muhé a proba ku e ta hòmber di bèrdat!

Ma si nos ta kere ku pornografia tin e mésun definishon awendia, nos ta sumamente kiboká. Pòrtrètnan di desnudes femenino ta lushi skol kompará ku e nivel inkreiblemente degenerá di pornografia awendia. E pornografia di awe ta enserá kualke forma di porkeria seksual ku mente humano por fantaser.

Revistanan pornográfiko ta spantoso, konteniendo pòrtrèt di hende muhé mará, sutá, violá, torturá, i abusá pa un pèrsona òf un gèng. Masokismo i sadismo ta temanán pornográfiko favorito. Tin "posenan" di gruponan heteroseksual, homoseksual, òf lèsbian den akshon. Videonan di pervershon seksual di tur forma imaginabel. Adultonan di ambos sekso teniendò relashon seksual ku muchanan di asta tres aña di edat. Un tata "gosando" sèks ku su yu muhé, un mama méskos ku su yu hòmber, ruman ku ruman, mucha ku mucha, hende ku bestia--aktonan ku Dios ta kondená (Levítiko 20:10-21). Otro aktonan muchu vulgar pa menshoná tambe ta presentá.

Nò, e pornografia di ayera no ta e pornografia di awe; i pornografia di awe ta hasiendo hopi daño na hende muhé, muchanan, matrimonio, famia, esun ku ta hasi uso di pornografia, i nos komunidad. Pensa tokante algun daño.

Ambos sekso a ser kreá pa Dios. "...segun imagen di Dios El a krea hende. El a krea nan hòmber i muhé" (Génesis 1:27). Ma pornografia ta roba tur dignidat di e sekso femenino.

Ademas, kontinuamente pornografia ta duna e impreshon ku hende muhé tin un apetit insasiabel pa sèks. Na vários forma e idea ta presentá ku ora hende muhé ta nenga hasi sèks, loke e ta deseá di bèrdat ta pa e hòmber fors'é, viol'é! E muhé ta bringa, ma tòg e ta gusta. Bo esposa òf yu muhé por ta e siguiente víktima di e adikto di pornografia ku ta kere e mentira kruek aki! Di bèrdat, violashon ta kousa un herida emoshonal ku ta dura añanan pa kura.

Inevitablemente pornografia ta kai den man di muchanan. Resultado di esaki por ta desastroso. Si pornografia ta trose e pèrspektiva seksual di adultonan, kòrda kiku e ta hasi ku muchanan impreshonabel. E mucha ta eksperimentá, guiá pa konseptonan diabóliko.

Un mama a presentá na kantor di dòkter ku su kuater yunan. El a konta ku su yu hòmber di 14 aña ta kumpra revistanan pornográfiko. Despues di studia nan hambrá, e no por dominá su mes i ta bai den kamber di su ruman muhé di 12 aña, ruman muhé di 11 aña, i e ruman hòmber di ocho aña i ta violá nan tur. Esaki tabata sosodé vários bes kada siman...PA SINKU AÑA KABA! Pues, el a kuminsá hasi esaki ku nuebe aña, tempu ku su ruman hòmber tabatin solamente tres aña!

Muchanan ta víktima di pornografia tambe debí ku pornografia ta promové sèks entre adultonan i MUCHANAN. Despues ku su mayornan a divorsia, kada wikent e yu hòmber di dos aña tabata yora despues di bishitá su tata. E mama no por a komprendé dikon. Porfin, ora e tabatin kuater aña, a bin sali na kla ku e tata un adikto di pornografia, tabata violá su yu rípidamente kada wikent.

Loke nos ta trese dilanti no ta bunita. E ta mahós, vulgar, i spantoso! Ora hende ta kuminsá sasia nan apetit seksual ku video, pelikula, revista, èts. eksplisito degenerá, e chèns ta grandi ku nan por bira adikto di pornografia i deseá mas, mas, mas! I méskos ku droga, pornografia ta destruí bidanan!

Si bo ta kere ku bo ta basta fuerte pa "gosa" un revista òf pelikula pornográfiko, kuidou! Beibel ta bisa "Es ku ta kere ku e ta para, tene kuidou pa e no kai" (1 Korintionan 10:12). Kada biaha bo ta wak, bo ta kontaminá bo mente.

Ademas nos ta supliká esnan ku ta bende, hür, òf transmití programa, literatura, òf video pornográfiko pa habri wowo pa e daño nan ta kousa. Bo akshonnan no solamente ta irresponsabel, kontaminando nos komunidad ku e porkeria aki, ma bo tambe ta sikiera parsialmente responsabel pa e degenerashon moral i kualke krimen kometé influensia pa e maldita pornografia!